

**TEZAUUR LITURGIC**  
**24 MAI**

**ACATISTUL**  
**SF. CUVIOS**  
**NICHITA**  
**DE LA**  
**PERIASLAV**



**MOSCOVA, 2000**



## Акафист

# Святому преподобному Никите Столпнику, Переяславскому чудотворцу

---

### Кондак 1

Взбранный чудотворче и великий Христов  
угодниче! Восхваляем тя с любовью, чада твоя,  
тепла предстателя к Богу тебе стяжавше. Ты же  
моли прославившаго тя Господа от всяких нам  
бед свободитися, зовущим:

Радуйся, Никито преподобне, столпниче и  
чудотворче.

### Икос 1

Ангелов подобника и бесов противоборца,  
провидя тя всея твари Зиждитель, словесы  
пророческими, — «измыйтесь и чисти будите», —  
на покаяние огласив тя, яко втораго Павла,  
человеколюбно к Себе призва, нас же научи  
ублажати тебе сице:

Ра́дуйся, сосу́де избра́нный, свы́ше Бо́гом  
предуве́данный;

ра́дуйся, в хра́м Ду́ха Всесвята́го  
предуста́вленный.

Ра́дуйся, сподо́бивыйся Боже́ственного  
призва́ния;

ра́дуйся, удо́стоивыйся от Го́спода  
о́правда́ния.

Ра́дуйся, благода́ть Бо́жию, умягча́ющую  
се́рдце твоё, получи́вый;

ра́дуйся, очисти́тельного пока́ния то́ки слёз  
исто́чивый.

Ра́дуйся, ве́ру в призва́вшего тя Го́спода  
несумне́нну восприя́вый;

ра́дуйся, всего́ себе́ водите́льству Бо́жию  
преда́вый.

Ра́дуйся, супру́жницу и клеврётóв твои́х  
Го́спода ра́ди оста́вивый;

ра́дуйся, невозвратное твоё шество́ние к  
сниска́нию спасе́ния напра́вивый.

Ра́дуйся, Ца́рствия небесна́го стяжа́телю;

ра́дуйся, о всѣх к тебе́ притека́ющих тёплым  
ко Го́споду предста́телю.

Ра́дуйся, Ники́то преподо́бне, сто́лпниче и чудотво́рче.

## Конда́к 2

Ви́дя супру́жницу твою́, дивя́щуюся премене́нию сне́дных мя́с, я́кобы в челове́чския чле́ны, и недоумева́ющую о неиспове́димых судьба́х Бо́жих, свы́ше озаре́н, испове́дал еси́, я́ко Госпо́дь на покая́ние тя́ призыва́ет, и а́бие позна́л еси́ спаса́ющему тя́ Бо́гу пе́ти: Аллилу́ия.

## И́кос 2

Ра́зум недоразумева́емый, в дивном призва́нии твоём проявле́нный разуме́ти ища́, преподо́бне о́тче Ники́то, помышля́л еси́, ка́ко о Го́споде возмо́щи ми́р и диа́вола посра́мити, к ла́вре свята́го великомученика Ники́ты а́бие поте́кл еси́, иде́же и а́нгельский о́браз на ся́ воспри́им, до́бль во́ин Христо́в показа́лся еси́. Мы́ же, Го́спода спаса́шаго тя́ прославля́юще, ра́достно вопие́м ти́:

Ра́дуйся, я́ко мыта́рь, ко Го́споду о поми́ловании вопия́вый;

ра́дуйся, я́ко заблуждши́й сы́н, Отца́ Небе́снаго взыска́вый.

Ра́дуйся, я́ко ханане́я, от Христа́ не  
отступа́вый;

ра́дуйся, я́ко блудни́ца, о гресéх рыда́вый.

Ра́дуйся, я́ко Езеки́а, умíльно моли́выйся;

ра́дуйся, я́ко Манасси́я, в покая́нии  
смирíвыйся.

Ра́дуйся, я́ко Йо́в, искуше́ния крèпко  
терпе́вый;

ра́дуйся, я́ко Дании́л, премúдрость Бо́жию  
разуме́ти вожде́лый.

Ра́дуйся, Дави́дово раская́ние яви́вый;

ра́дуйся, Петро́вы слéзы источи́вый.

Ра́дуйся, пúть и́стинный к животу́ вéчному  
обретýй;

ра́дуйся, я́ко крин, любóвию Божéственною  
процветýй.

Ра́дуйся, Никíто преподо́бне, сто́лпниче и  
чудотво́рче.

### **Конда́к 3**

Си́ла Вы́шняго осени́ тя, преподо́бне о́тче  
Никíто, егда́ в нача́ле не бы́л еси́ удосто́ен  
прия́тия в ла́вру великомúченика Никíты, и  
тридне́вным твои́м пред враты́ о́ныя

приседе́нием и всена́родным грехо́в твои́х  
испове́данием, победи́теля на диа́вола тя́ яви́,  
науча́я нас Даю́щему кре́пость лю́дем Свои́м  
Бо́гу пе́ти: Аллилу́ия.

### И́кос 3

Име́яй богоприя́тное стре́мле́ние во святе́й  
ла́вре вели́комучени́ка Ники́ты водвори́тися, но  
от сея́ бы́в отреча́емь, в ти́нное бла́то на́г  
пове́рглся еси́ на терза́ние мши́цем и гадо́м. Мы́  
же, толи́ко кре́пкому́ тво́ему́ терпе́нию  
дивя́щися, вопие́м ти́:

Ра́дуйся, ми́ру еди́ножды наве́гда́ уме́рый;  
ра́дуйся, нераска́янно вся́ кра́сная ми́ра сего́  
презре́вый.

Ра́дуйся, тщесла́вныя по́мыслы смири́вый;  
ра́дуйся, мы́сль в Бо́зе утверди́вый.

Ра́дуйся, сребролю́бие изсуши́вый;  
ра́дуйся, сластолю́бие умертви́вый.

Ра́дуйся, вся́кий гне́в и избы́ток зло́бы  
отложи́вый;

ра́дуйся, смиренному́дрие возлюб́ивый.

Ра́дуйся, ду́шу твою́ по сло́ву Христа́  
возненави́девый;

ра́дуйся, де́лы благи́ми Велиа́ра преоби́девы́й.

Ра́дуйся, пло́ть со страстьми́ и похотьми́ распный́;

ра́дуйся, по обра́щении твоём не себе́, но еди́ному Бо́гу живы́й.

Ра́дуйся, Никито́ преподо́бне, сто́лпниче и чудотво́рче.

#### **Конда́к 4**

Бу́рю вну́тр име́я помышле́ний сумни́тельных, святы́я ла́вры игу́мен смяте́ся, зря́ тебе́, грехолю́бива бы́вша, на по́двиги ино́чествующих то́лько бо́дренно дерза́ющая, в ме́сте те́сне ты́ затвори́ во испытáние блага́го твоего́ произво́ления; ты́ же на диа́вола, я́ко Дави́д на Голиа́фа, единобо́рствовати ра́достно с ка́менем ве́ры поте́кл еси́, поя́ Го́споду си́л: Аллилу́ия.

#### **И́кос 4**

Слы́шав сказа́ния жити́й дрéвних подви́жников, преподо́бне, ка́ко от Го́спода наста́вляеми и укрепля́еми, труды́ ко трудо́м прилага́ху, те́м подража́ти возревновáл еси́, и тяжкия́ вери́ги, по благослове́нию игу́мена, на ся́ возложив, де́нь и но́щь в моли́твах пребыва́л еси́.

Мы́ же, дѣ́вное твоѣ́ подви́жничество  
просла́вляя, зове́м ти́ такова́я:

Ра́дуйся, жити́ем отце́в пусты́нных  
пленѣ́нный;

ра́дуйся, лю́бовию Боже́ственнойю  
распа́ленный.

Ра́дуйся, произво́льное у́зничество  
возлю́бивый;

ра́дуйся, во умерщв́ление плóти желе́за на  
себе́ возложѣ́вый.

Ра́дуйся, в по́двизех неутомѣ́мый;

ра́дуйся, во благоче́стии неохладѣ́мый.

Ра́дуйся, во плóти безплóтных а́нгелов  
сожителю́;

ра́дуйся, своего́ произво́ления во́ли Бо́жией  
покорѣ́телю.

Ра́дуйся, исправлѣ́нии твоѣ́ми безплóтных  
удивѣ́вый;

ра́дуйся, равноа́нгельнаго жити́я о́браз  
и́стинный на́м явѣ́вый.

Ра́дуйся, в собесѣ́дование с Бо́гом вы́ну  
углублѣ́нный;

ра́дуйся,                      благода́тию                      Бо́жиею  
преобогаше́нный.

Ра́дуйся, Никито преподо́бне, сто́лпниче и  
чудотво́рче.

### **Конда́к 5**

Богопе́сненную псалти́рь к дости́жению  
небе́снаго оте́чества, я́ко свети́льник, во уме́  
твоём вы́ну содержа́, то́ю прославля́л еси́  
Небе́снаго Отца́, воспева́я: Аллилу́ия.

### **И́кос 5**

Ви́девше бли́жнии и да́льнии, е́же по Бо́зе  
жити́е твоё, преподо́бне, чу́дному твои́х нра́вов  
измене́нию уди́вляхуся, добродéтели же и  
по́двиги тво́я прославля́ху, с ни́ми же и мы́ си́це  
вопи́ем ти́:

Ра́дуйся, я́ко в ста́рости крéпость му́жескую  
показа́л еси́;

ра́дуйся, я́ко обе́т ино́чества дела́ми оправда́л  
еси́.

Ра́дуйся,            в            мно́гостра́стней            плóти  
подвиза́вься, я́ко безплóтный;

ра́дуйся,            благими            по́мыслы            и            де́лы  
мно́гопло́дный.

Ра́дуйся, твоими по́двиги от обленéния нас  
возста́вляй;

ра́дуйся, твоёю жи́знию пу́ть ко спасéнию  
всём изъявля́й.

Ра́дуйся, любовь вéлию к Бо́гу показáвший;  
ра́дуйся, многообра́зне по́мощь Бо́жию  
испытáвший.

Ра́дуйся, Бо́жией любви́ к ка́ющимся зерца́ло;  
ра́дуйся, подвизáющимся на диа́вола крéпкое  
забра́ло.

Ра́дуйся, вы́ну о нас с моли́твою Бо́гу  
предстоя́щий;

ра́дуйся, и по днёсь оби́тель твою́ неруши́му  
храня́щий.

Ра́дуйся, Никито́ преподо́бне, сто́лпниче и  
чудотво́рче.

### **Конда́к 6**

Пропове́дают тяжкия́ твоя́ вери́ги,  
смиреному́дре Никито́, труды́ и болéзни, Бо́га  
ра́ди тобою́ подъя́тыя, ихже́ ра́ди дивно́  
просла́ви тя́ Госпо́дь, обильны́я исцелéний струи́  
тобою́ источáя нам, да вы́ну поём́ Ему́: Аллилу́ия.

## И́кос 6

Возсия́вшая в сокруше́нном се́рдце твоём  
благода́ть Всесвята́го Ду́ха, прови́дца бу́дущих, и  
ско́раго наве́туемым от бесо́в свободи́теля  
показа́ ты, преподо́бне, науча́я все́х вопи́ти тебе́  
си́це:

Ра́дуйся, пре́дняя, я́ко настоя́щая  
прорека́вый;

ра́дуйся, да́льная, я́ко близ су́щая  
прозира́вый.

Ра́дуйся, я́ко князю́ Михаи́лу вино́  
разслабле́ния его́ телеснаго объясни́л еси́;

ра́дуйся, я́ко му́ченическую кончи́ну ему́ и  
боля́рину его́ бы́ти предвести́л еси́.

Ра́дуйся, со проро́ки просла́вленный;

ра́дуйся, чудотво́рцем сопричи́сленный.

Ра́дуйся, горды́ни диа́волей низложите́лю;

ра́дуйся, бесо́в прогони́телю.

Ра́дуйся, си́лу вра́жию попра́вый;

ра́дуйся, в си́ле Бо́жией преспева́вый.

Ра́дуйся, я́ко Ца́рствие Бо́жие вну́трь себе́  
стяжа́л еси́;

ра́дуйся, я́ко Христа́ на ве́ки в тебе́ жи́ти  
восприя́л еси́.

Ра́дуйся, Ники́то преподо́бне, сто́лпниче и  
чудоотво́рче.

### **Конда́к 7**

Хотя́щу диа́волу явлéнием сво́им во о́бразе  
драко́на устраши́ти тя́, стоя́ща на моли́тве,  
ору́жием креста́ пораже́ние всеконéчное нанéсл  
еси́, победителю́ Бо́гу воспева́я: Аллилу́ия.

### **И́кос 7**

Но́вую тва́рь показа́ тя́ Зижди́тель, от  
миролю́бия к толи́кому боголю́бию се́рдце твоё  
обрати́в, преподо́бне о́тче, я́ко ты́ на сто́лп, а́ки  
Или́я на о́гненную колесни́цу, возше́д, бде́ние,  
по́ст и моли́тву, а́ки ко́ни быстроте́чныя от  
земли́ к небеси́ стяжа́л еси́, и та́ко ко Христу́  
предста́в, вы́ну ходата́йствуеши о́ нас,  
вопию́щих тебе́:

Ра́дуйся, я́ко е́же по Бо́зе и́стинное жити́е  
позна́л еси́;

ра́дуйся, я́ко то́е и́щущим дела́ми показа́л  
еси́.

Ра́дуйся, велему́дров ве́ка сего́ обуи́вый;

ра́дуйся, и́стинную му́дрость в  
смиренному́дрии бы́ти яви́вый.

Ра́дуйся, и́го Христа́ восприя́вый;

ра́дуйся, бла́гость о́наго жити́ем оправда́вый.

Ра́дуйся, я́звы Го́спода Иису́са любэ́зне на  
те́ле тво́ем понéсший;

ра́дуйся, всего́ себé в же́ртву Го́сподеви  
принéсший.

Ра́дуйся, земный стра́нниче;

ра́дуйся, Бо́жий избра́нниче.

Ра́дуйся, мона́хов наста́вниче;

ра́дуйся, богоприя́тный о нас моли́твенниче.

Ра́дуйся, Ники́то преподо́бне, сто́лпниче и  
чудотво́рче.

### **Конда́к 8**

Стра́нное и пресла́вное чу́до ви́дится все́м,  
притека́ющим к тебе́, о́тче Ники́то, я́ко и вода́ от  
изры́тых тобо́ю кладенце́в, че́рпемая с ве́рою,  
телесны́я и душе́вны́я недуги́ исцеля́ет, науча́я  
чудоде́ющему Бо́гу пе́ти: Аллилу́ия.

## И́кос 8

Весь от Всесвятаго Бога облагодатствован еси, преподобне отче, яко духом престолу Божию предстоиши, телом же в недре земли почивая, от гроба твоего подаеши цельбы. Сего ради и взываем ти таковая:

Ра́дуйся, вёрный ра́бе Влады́ки Всеблага́го;  
ра́дуйся, хра́ме преукраше́нный Ду́ха  
Всесвята́го.

Ра́дуйся, Царя́ Небесна́го предста́телю;  
ра́дуйся, ско́рый проше́ний пода́телю.

Ра́дуйся, исто́чнице исцеле́ний;  
ра́дуйся, сокрови́щнице чудотворе́ний.

Ра́дуйся, ви́димыми чуде́сы неви́димую  
благода́ть, в тебе́ су́щую, явля́яй;  
ра́дуйся, вёрных ду́ши зна́меньми в ве́ре  
утвержда́я.

Ра́дуйся, ча́дам Це́ркви лучеза́рный  
свети́льнице;

ра́дуйся, дивный Христо́в уго́днице.

Ра́дуйся, увенча́нный подви́жнице;

ра́дуйся, Бо́гу при́сный люби́миче.

Ра́дуйся, Ники́то преподо́бне, сто́лпниче и  
чудоотво́рче.

### Конда́к 9

Вся́кое естество́ а́нгельское удиви́ся вели́кому  
свы́ше тебе́ дарова́нию, преподо́бне Ники́то, я́ко  
и древя́ный по́сох тво́й, стра́ждущему телесным  
разслабле́нием Черни́говскому кня́зю Михаи́лу  
по́сланный от тебе́ и в ру́ку им прия́тый, а́бие  
исцеле́ние тому́ дарова́ и научи́ его́ пе́ти  
чудоде́ющему тобо́ю Бо́гу: Аллилу́ия.

### И́кос 9

Вети́и многовеща́ннии недоуме́ют по  
достоя́нию восхва́лити тя́, достосла́вне о́тче, я́ко  
па́че естества́ си́лу вра́жию пресла́вно  
низлага́еши. Е́ще бо в телеси́ пребыва́я, бе́са,  
ше́ствовавшу к тебе́ кня́зю Михаи́лу явльша́ся  
во о́бразе ино́ка и благо́е кня́же предпри́ятие  
воспяца́вша, ви́димо к столпу́ тво́ему и́менем  
Христа́ пригвозди́л еси́, и подне́сь ту́южде  
вла́сть на бе́сы явля́еши, разруша́я  
злокóзненныя де́йства их на челове́ков. Сего́  
ра́ди и зове́м ти́ си́це:

Ра́дуйся, лжи́ диа́волей обли́чителю;  
ра́дуйся, преле́сти бесо́вския посра́мителю.

Ра́дуйся, вла́сть на ду́хи нечи́стыя прия́вый;  
ра́дуйся, ту́южде и по сме́рти удержáвый.

Ра́дуйся, я́ко де́мони и грóба твоего́ трепéщут;  
ра́дуйся, я́ко на них и вери́ги твоя́ стрéлы  
паля́щия ме́щут.

Ра́дуйся, я́ко бе́сныя во оби́тель твою́ то́чию  
ну́ждею привлача́еми бы́вають;

ра́дуйся, я́ко о́нии здра́ви и смы́слящии ту́ю  
оставля́ют.

Ра́дуйся, я́ко де́мони здé и не хотя́ще себе́  
открывáют;

ра́дуйся, я́ко тобо́ю гонíми, из одержи́мых  
и́ми ско́ро убега́ют.

Ра́дуйся, река́ исцелéний бы́стротéчная;  
ра́дуйся, стра́жа оби́тели вéчная.

Ра́дуйся, Ники́то преподо́бне, сто́лпниче и  
чудотво́рче.

### **Конда́к 10**

Спасти́ хотя́ ду́шу твою́, богому́дре о́тче, в  
кро́тости и смиренному́дрии Христо́ве вы́ну  
поучáлся и дивно преуспе́л еси́. Те́мже и рабо́м  
твои́м, хотя́щим ну́жно изъя́ти ду́шу твою́,  
ничто́же прере́кл, ниже́ возопи́л еси́, но, я́ко

а́гнец незло́бивый, главу́ подкло́нив, сме́рть от  
те́х прия́л еси́, поя́ Бо́гу: Аллилу́ия.

## И́кос 10

Стена́ еси́ все́м, воспева́ющим тя́ и  
притека́ющим с ве́рою к заступле́нию твоему́,  
Никито́ сто́лпниче. Те́мже и на́м, к тебе́  
прибега́ющим, бу́ди сто́лп непоколебимъ, от  
всяких на́с бе́д и напа́стей вы́ну застеня́я и  
огражда́я, за е́же и поём тебе́ такова́я:

Ра́дуйся, приста́нище обурева́емых;

ра́дуйся, по́моще озлобля́емых.

Ра́дуйся, ско́рбных утёшителю;

ра́дуйся, немощных укрепите́лю.

Ра́дуйся, грёшным Бо́га умило́стивля́я;

ра́дуйся, благих в добро́е утвержда́я.

Ра́дуйся, ка́ющихся своим приме́ром  
ободря́я;

ра́дуйся, о спасе́нии подви́зающимся  
спобора́я.

Ра́дуйся, мятущихся по́мыслами умири́телю;

ра́дуйся, вра́жиих наве́тов отрази́телю.

Ра́дуйся, на́ших царей держа́во и похва́ло;

ра́дуйся, гра́да Переясла́вля утвержде́ние и красото́.

Ра́дуйся, Ники́то преподо́бне, сто́лпниче и чудотво́рче.

### **Конда́к 11**

Пе́ние благода́рственное Го́споду прино́сят вси́, прие́млющи, ви́дящи и слы́шащи мно́гочисленна́я чудеса́, от тяжких вери́г и гроба́ твоего́ быва́ющая си́лою Бо́жиею, ю́же ты́ вы́ну на небесе́х прославля́еши, поя́ Бо́гу: Аллилу́ия.

### **И́кос 11**

Светоза́рное свети́ло, на твёрди церко́вней возсия́вшее, преподо́бне о́тче Ники́то, показа́ша ты́ три́ огневи́дныя столпы́, я́вльшияся над повер́женными от убийц твои́х и я́ко дре́во в вода́х Во́лжских пла́вавшими твои́ми вери́гами, я́же и положи́ти зде́ на гробе́ твоём, я́ко по́честъ трудо́в твои́х, в но́щнем видении́ повеле́л еси́. Чесó ради́ твоё водворе́ние во све́лостех святы́х бы́ти уразуме́вше, ты́ воспева́ем:

Ра́дуйся, жителю́ Божество́ннаго селёния;  
ра́дуйся, дости́гший ве́чнаго упоко́ения.

Ра́дуйся, бла́г неизрече́нных наслажда́ющийся;

ра́дуйся, лицезрѣния Божія насыщающийся.  
Ра́дуйся, со а́нгелы прісно ликующий;  
ра́дуйся, трисвяту́ю пѣснь немолчно поющий.  
Ра́дуйся, с преподобными ублажаемый;  
ра́дуйся, с мучениками увенчаемый.  
Ра́дуйся, радостію вѣчною преисполняемый;  
ра́дуйся, любовью Божественною  
преуслаждаемый.

Ра́дуйся, яко тобою Вы́шний на небесі́ и на  
землі́ сла́вится;

ра́дуйся, яко и ты́ сего́ ради Вы́шним на  
небесі́ и на землі́ просла́вился.

Ра́дуйся, Никіто преподобне, столпниче и  
чудотворче.

## **Конда́к 12**

Благодать чудес твоих, преподобне отче  
Никіто, в сердце первосвятителя Фотія велие  
ко отысканию многоцелебных мощей твоих  
желание возжже. Ты же, богомудре, аще и  
попустил еси откопати и видети нетленное и  
чудесы благоухающее тело твое; обаче якоже и  
прежде человеческия славы убегавший, всех из  
храма, аки бурю, изринув, паки себе в землю

скрыл еси. Чесó ради дивному во святых Своих Богу Иаковлю воспеваем: Аллилу́ия.

## И́кос 12

Пою́ще пресла́вно де́йствующаго тобо́ю чудеса́ Царя́ Небеснаго, ты́, о́тче достосла́вне, восхваля́ем, а́ще и недосто́йными уста́ми, о́баче усер́дно ублажа́я ты́ си́це:

Ра́дуйся, честное́ Пресвяты́я Тро́ицы носило́ и похва́ление;

ра́дуйся, святы́ни Ду́ха чи́стое и непоро́чное селе́ние.

Ра́дуйся, чудес пучи́но, Богом излия́нная;

ра́дуйся, мирова́рнице, на вся́ недуги́ врачевания́ми преизобильная́.

Ра́дуйся, о́бразе а́гнцем и па́стырем;

ра́дуйся, преукраше́нный вся́ким Божество́нным дарова́нием.

Ра́дуйся, пра́вило ве́ры и о́бразе крото́сти духо́вныя;

ра́дуйся, зрите́лю красotý Божество́нныя неизрече́нныя.

Ра́дуйся, ми́ра Христо́ва благоуха́ние;

ра́дуйся, многоцвѣ́тный крѣ́не ра́йскаго прозябѣ́ния.

Ра́дуйся, я́ко а́нгели о твои́х исправлѣ́ниях ра́дуются;

ра́дуйся, я́ко мно́зи челове́цы по тво́ему примѣ́ру и предста́тельству спаса́ются.

Ра́дуйся, Ники́то преподо́бне, сто́лпниче и чудотво́рче.

### **Конда́к 13**

О, пресла́вный чудотво́рче и вели́кий Христо́в уго́дниче, а́вво Ники́то преподо́бному́чениче! Ны́нешнее на́ше хвалѣ́бное приноше́ние приѣ́мши, не оста́ви прѣ́сно ходата́йствовати о на́с у Отца́ Небе́снаго, да в жити́и се́м се́тей вра́жиих и прѣ́лести бесо́вския избы́вше, возду́шных мыта́рств и ге́енны вси́ избе́гнем, и всельше́ся в го́рний Иерусали́м, сподо́бимся с тобо́ю пе́ти Всеблагóму Бо́гу на́шему вѣ́чно немóлчное: Аллилу́ия.

*Се́й конда́к глаго́ли три́жды. И на́ки четѣ́тся 1-й и́кос и конда́к 1-й.*

### **Моли́тва**

О, всечестна́я главо́, преподо́бне о́тче преблажѣ́нне, вели́кий а́вво Ники́то

преподобномучениче! Не забуди нищих твоих до конца, но поминай нас всегда во святых своих и благоприятных молитвах к Богу, и не забуди присещати чад своих. Моли за ны, отче благий и избранниче Христов, яко имея дерзновение к небесному Царю, и не премолчи за ны ко Господу, и не презри нас, верою и любовью чтущих тя. Поминай нас, недостойных, у престола Вседержителя и не престай моляся за нас ко Христу Богу, тебе бо дана бысть благодать молиться за ны. Не мним бо тя мертва суща, аще бо и телом преставился еси от нас, но и по смерти убо жив пребываеши. Не отступай от нас духом, сохраняя и соблюдая нас от стрел вражиих и всякия прелести бесовския, заступниче и молитвенниче наш добрый. Аще бо и мощей твоих рака пред очима нашими видима есть всегда, но святая твоя душа со ангельскими воинствы, со безплотными лики, с небесными силами у престола Вседержителя Бога в лепоту достойно веселится. Ведуще убо тя воистинну и по смерти жива суща, тебе припадаем, и тебе молимся, и мили ся деем, еже молиться о нас Всесильному Богу о пользе душ наших, и испроси нам время на покаяние и невозбранно прейти от земли на небо, и горьких мытарств, и

возду́шных князе́й, и ве́чныя му́ки изба́виться  
на́м, и небе́сному Ца́рствию насле́дником бы́ти  
со все́ми пра́ведными, от ве́ка угоди́вшими Ему́,  
Го́споду на́шему Иису́су Христу́. Ему́же подоба́ет  
вся́кая сла́ва, че́сть и поклонéние, со  
Безнача́льным Его́ Отце́м и Святы́м Ду́хом, ны́не  
и при́сно и во ве́ки веко́в. Ами́нь.

